

四庫全書

史部

欽定四庫全書

史部  
欽定續通志卷三百十四  
五

中書<sub>臣</sub>李采覆勘

總校官原任侍講臣王燕緒

錄定四碑全書

錄定續通志卷三百十四

列傳

宋十八

何繼筠 承矩

李漢超 守恩

郭進

李謙溥 允則 允正

姚內斌

董遵誨

賀惟忠

馬仁瑤

何繼筠字化龍河南人父福進歷事後唐至周累官忠

武成德天平三節度繼筠幼時與羣兒戲必分行伍為  
戰陣之象晉初補殿直周祖討三叛表繼筠從行賊平  
改供奉官廣順初福進鎮真定署衙內都校嘗領偏師  
出土門與并人戰以功領欽州刺史契丹將高模翰率  
二千騎擾深冀以葦棧渡胡盧河繼筠與虎捷都指揮  
使劉誠誨率兵拒之至武強獲老稚千餘人模翰遁去  
俄隨福進入朝為內殿直都知福進卒起復為濮州刺  
史領兵戍靜安軍契丹內侵繼筠逆擊敗之改棣州刺

史世宗征瓦橋關命繼筠以所部兵出百井道破并人  
數千衆太祖建隆二年升棣州為團練以繼筠充使三  
年命為關南兵馬都監乾德四年加本州防禦使開寶  
元年命昭義節度李繼勳等征太原以繼筠為千鋒部  
署至渦河與并人遇擊走之奪汾河橋敗其衆於城下  
獲馬五百匹擒其將張環石贄按東都事略長編俱作石斌以獻二  
年春太祖親征晉陽契丹來援繼筠時屯兵陽曲縣驛  
召至行在所授以方略命將精騎數千赴石嶺關拒契

丹謂之曰翌日亭午俟卿來奏捷也至期帝御北臺以俟見一騎自北來亟遣逆問之乃繼筠子承睿來獻捷

生擒刺史二人

按長編作擒其武州刺史王彥符

俘獲甚衆初并人恃

契丹為聲援及奏捷太祖命以所獲首級鎧甲示城下并人喪氣繼筠以功拜建武軍節度判棣州三年來朝詔賜鞍馬戎仗令戍邊四年來朝疽發背車駕幸其第錫賚甚厚未幾卒年五十一帝謂侍臣曰繼筠捍邊有功朕不早授方鎮者慮其數奇耳今纔領節制果至淪

沒良可惜也贈侍中令以生年所佩劔及介冑同葬繼  
筠深沉有智略前後備邊二十年與士卒同甘苦得其  
死力善揣邊情邊人畏伏多畫像祠之子承矩按宋史  
此上有

李進卿傳及退卿子延渥附傳並  
楊美傳俱無事蹟足錄今從刪

承矩字正則幼為棣州衙內指揮使從繼筠討劉崇擒  
其將胡澄以獻開寶四年授開府副使太平興國三年  
漳泉陳洪進納土詔承矩乘傳監泉州兵會仙遊莆田  
百丈寇賊嘯聚承矩與喬維岳王文寶討平之以功就

遷開廩使疏為政之害民者數十事上之悉被容納會  
改使名即為崇儀使五年知河南府調丁男百十輩轉  
送上供綱承矩以為橫役奏罷其事徙知潭州凡六年

因圖屢空詔嘉獎之入為六宅使端拱元年領潘州

按東

都事略隆平刺史命護河陽屯兵米信知滄州以其不  
集俱作淄州

習吏事命承矩知節度副使實專郡治時契丹擾邊承  
矩請於順安砦西開易河蒲口導水東注於海東西三  
百餘里南北五七十里資其陂澤築堤貯水為屯田可



以遏敵騎之奔軼俟期歲間關南諸泊悉壅闡即播為  
稻田為禦邊之要策太宗嘉納之屬霖雨為災典者多  
議其非便承矩引援漢魏至唐屯田故事以折衆論務  
在必行乃以承矩為制置河北緣邊屯田使俾董其役  
事具食貨畧由是自順安以東瀕海廣袤數百里悉為  
稻田而有莞蒲蜃蛤之饒民賴其利淳化四年擢為西  
上閤門使知滄州踰年徙雄州承矩推誠御衆同其甘  
苦邊民有告機事者屏左右與之款接無所猜忌故契

丹動息皆能前知至道元年契丹精騎數千夜襲城下  
伐鼓縱火以逼樓堞承矩整兵出拒遲明列陣酣戰久  
之斬馘甚衆擒其酋所謂鐵林相公者契丹遁去是年  
府州嘗敗契丹衆承矩條殺獲以諭州民或揭於市契  
丹愧忿故有是役太宗意其輕率致寇復命與滄州安  
守忠兩換其任魏延式使河北得雄州功狀朝廷遣使  
覈實將士始獲推賞真宗嗣位復遣知雄州咸平二年  
契丹南侵屢遣內侍以密詔問禦遏之計密封以獻嘗

詔聽邊民越拒馬河交市承矩上言自淘河至泥姑海口屈曲九百餘里此天險也太宗置砦一十六鋪百二十五廷臣十一人戍卒三千餘部舟百艘往來巡警以屏姦詐則緩急之備大為要害今聽公私貿易則人馬交度深非便宜且砦鋪皆為虛設矣疏奏即停前詔屢被手札褒飭三年詔還拜引進使州民詣闕貢馬乞借畱承矩詔書嘉獎復遣之承矩言昨者契丹入侵高陽一路東負海西抵順安士庶安居即屯田之利也順安

至西山地雖數軍路繞百里縱有邱陵岡阜亦多川瀆  
泉源因而廣之制為塘埭自可息邊患矣又請於邊郡  
置營召募不須品度人才止求少壯有武藝者萬人俟  
契丹有警令智勇將統而用之又請復設緣邊推場以  
惠契丹縱其渝信犯盟亦不之廢大臣文武中別有良  
謀者請諉之邊任使施方略責以成功又建議選銳兵  
於乾寧軍挽力魚船自界河直趨平州境以牽西面之  
勢五年詔兼領制置屯田使始建權場或者謂承矩意

在繼好然契丹無厭未足誠信徒使公行窺伺會契丹有殺序候卒者復罷之時契丹數窺邊城大浚渠頗撓其役詔存矩握兵深入其境以分其勢承矩以無騎兵第遣數千卒出混泥城籠之而還景德元年入朝進領英州團練使出知澶州承矩自守邊以來嘗欲朝廷懷柔遠人為息兵之計及是與契丹修好真宗益善其有謀明年復知雄州是歲契丹遣使奉幣承矩上言朝廷待之以禮宜得中庶可久也真宗嘉納仍聽事有未盡者

便宜裁處三年真拜雄州團練使時邊兵稍息農政未  
修又置緣邊安撫使命承矩為之且詔邊民誘其復業  
承矩曰契丹間之必謂誘其部屬也乃易詔文為水旱  
流民之意王欽若時知樞密援漢蠶達周仲居改詔請  
罪承矩帝曰承矩任邊有功當優暇之第詔自今朝旨  
未便者奏稟進止承矩頗有識鑒典長沙日李沆王旦  
為佐承矩厚待之以為有公輔器善推步自知冥數乃  
以老疾求僻郡詔自擇其代承矩以李允則為請乃授

承矩齊州團練使遣之任至郡裁七日卒年六十一特

贈相州觀察使

按東都事畧作防禦使

以其子龜齡為侍禁昌齡

九齡為殿直遐齡為齋郎緣邊洎涿易州民間承矩卒皆相率詣雄州發哀昌齡娶齊王女太和縣主至內殿崇班昌齡子象中為閤門祇候

李漢超字顯忠

據東都事畧增

雲州雲中人始事鄴帥范延光

不為所知又事鄴帥高行周亦不見親信會周世宗鎮澶淵漢超遂委質焉即位補殿前指揮使三遷殿前都

虞候太祖即位改散指揮都指揮使領綿州刺史累遷  
控鶴左廂都統領恩州團練使從平李重進尋遷齊州  
防禦使兼關南兵馬都監漢超仕關南人有訟漢超強  
取其女為妾又貸而不償者太祖召而問之曰汝女可  
適何人曰農家也又問漢超未至關南契丹如何曰歲  
苦侵暴曰今復爾耶曰否太祖曰漢超朕之貴臣也為  
其妾不猶愈於農婦乎使漢超不守關南尚能保汝  
家之所有乎責而遣之密諭漢超曰亟還其女并所貸



朕姑貫汝勿復為也。不足於用，何以不告朕耶？漢超感泣，誓以死報。在郡十七年，政平訟理，吏民愛之。詣闕求立碑頌德。太祖詔率更令徐鉉撰文賜之。霸州監軍馬仁瑀嘗兄事漢超，多自肆，擅發麾下卒入遼境剽奪人。口羊馬由是二將交惡。太祖慮其生邊，遣中使賜漢超仁瑀金帛，令和解之。太平興國初，遷應州觀察使。判齊州，仍為關南巡檢。二年八月卒於屯所。太宗甚悼惜，贈太尉、忠武軍節度使。漢超善撫士卒，與之同甘苦，死之日。

軍中皆流涕子守恩

守恩少驍果善戰有父風太祖親征太原漢超為北面  
行營都監守恩從父軍中會契丹遣兵援河東至定州  
西嘉山將入土門守恩領牙兵數千騎戰敗之太祖謂  
左右曰此稚子能若是他日將帥才也漢超卒擢為驍  
猛軍校累官至隴州刺史知靈州與轉運使陳緯部芻  
糧過瀚海為賊所邀守恩及子廣文助教象之隴州衙  
內指揮使望之弟寄班守忠皆沒真宗間之震悼特賜

守恩洪州觀察使次子祐之順之用之潤之慶之成之  
藏之

郭進深州博野人少貧賤為鉅鹿富家傭保有膂力倜  
儻任氣結豪俠飲酒博其家少年恚之欲圖殺進富人  
婦竺氏陰知其謀以告進遂走晉陽隸漢祖帳下晉開  
運末契丹擾邊漢祖建號太原契丹主道殂漢祖將入  
汴進請以奇兵間道先趨洛州因定河北諸郡累遷乾  
坊二州刺史出帝即位改磁州仕周由淄州移刺登州

討平羣盜部內清肅民吏千餘人詣闕請立屏盜碑許之顯德初改衛州河朔盜匿汲郡山谷間為民患進以計翦滅之郡民又請立碑記其事改洺州團練使有善政郡民復詣闕請立碑頌德特詔左拾遺鄭起撰文賜之進嘗於城四面植柳壕中種荷芟蒲亂後益繁茂郡民見之有垂涕者曰此郭公所種也太祖即位親征澤潞遷本州防禦使克西山巡檢嘗與曹彬王全斌入太原境獲數千人開寶二年太祖親征河東以進為行營

前軍馬軍都指揮使九年命將征河東以進為河東道  
忻代等州行營馬步軍都監招徠山後諸州民三萬七  
千餘口太平興國初領貴州觀察使判邢州仍兼西山  
巡檢四年車駕將征太原先命進分兵控石嶺關為都  
部署以防北邊契丹果入侵進擊敗之攻破西龍門砦  
俘馘來獻自是并人奪氣時田欽祚護石嶺軍恣為不  
法進雖力不能禁亦屢形於言進武人性剛烈戰功高  
欽祚以他事侵之心不能甘自經死年五十八欽祚以

暴卒聞太宗悼惜久之贈安國軍節度後頗聞其事因  
罷欽祚內職出為房州團練使進有才幹輕財好施御  
下嚴毅在西山時太祖遣戍卒必諭之曰汝輩謹奉法  
我猶貸汝郭進殺汝矣嘗有軍校自西山詣闕誣進陰  
通太原將有異志太祖遣使送與進令殺之進釋不問  
使禦并寇曰汝有功即薦汝於朝敗則復來也其人果  
用命立功而還進即奏授以官太祖從之初開寶中太  
祖令有司造宅賜進悉用甬瓦有司言舊制非親王公

主之第不可用帝怒曰進控扼西山十餘年使我無北

顧憂我視進豈減兒女耶亟往督役無妄言太平興國

初又賜宅一區

按宋史此下有牛思進傳無事蹟足錄今從刪

李謙溥字德明并州孟人少通左氏春秋歷事晉漢為

供奉官周廣順初遷供備庫副使世宗征劉崇遼州刺

史張乙堅壁不下遣謙溥單騎說之乙以城降以功改

開慶使師還留為晉州兵馬都監以偏師屢挫太原會

隰州刺史孫義卒時世宗親征淮南謙溥謂節帥楊廷

璋曰大寧咽喉要地不可關守且車駕出征若俟報則孤城陷矣廷璋即署謙溥權隰州事至郡亟命浚城隍嚴兵備未旬日而并人果以數千騎來寇方盛夏謙溥單衣揮扇從二小吏登城徐步按視戰具并人退舍後旬餘大發衝車攻城謙溥募敢死士得百餘人短兵堅甲銜枚夜縋出城會廷璋兵至合勢夾攻掩其不及并人大擾悉衆遁去追北數十里時顯德四年也明年五月攻克孝義縣以功領衢州刺史監軍如故世宗北征



召赴行在恭帝立位為澶州巡檢使詔城莫州數旬而  
就改丹州刺史太祖建隆四年移慈州兼晉隰緣邊都  
巡檢行石州事以興同砦為治所太祖命四路進兵畧  
地太原鄭州刺史孫延進絳州刺史沈繼深通事舍人  
王審等師出陰地以謙溥為先鋒會霍邑謙溥為畫攻  
取之策衆不能用軍還出白壁關次谷口又謂諸將曰  
王師深入敵境今既退兵彼必乘我當備之諸將亦不  
答謙溥獨令所部擐甲俄追騎果至延進等倉皇走谷

中獨謙溥麾兵拒之并人遂却復移隰州刺史開寶元年命李繼勳等征太原以謙溥為汾州路都監太祖征晉陽為東砦都監前軍副部署黨進遣謙溥伐木西山以給軍用未至聞鼓聲乃并人逼西砦大將趙贊禦之并衆未退謙溥麾所部赴之太祖遽至觀戰怪其赴援者非精甲問之乃謙溥也帝甚喜謙溥在州十年敵人不敢犯境有招收將劉進者勇力絕人謙溥撫之厚藉其死力往來境上屢以少擊衆并人患之為蠟丸書以

間進佯遺書道中晉帥趙贊得之以聞太祖令械進送  
闕下謙溥詰其事進伏請死謙溥曰我以舉家四十口  
保汝矣即上言進為并人所惡此乃反間也奏至帝悟  
遽令釋之賜以禁軍都校戎帳服具進感激願擊敵自  
効開寶三年召謙溥為濟州團練使會邊將失律復為  
晉隰緣邊巡檢使邊民皆喜爭相迎勞於道左六年領  
兵入太原連拔七砦八年以疾求歸京師疾篤累上章  
辭祿不許明年卒年六十二謙溥與宣祖同里閉弟謙

昇與太祖為布衣交其母閻嘗厚待太祖及即位數迎入宮中使左右掖之不令拜命坐飲食話及舊故賜賚優厚雍熙中太宗為許王納謙昇女為夫人以謙昇為如京副使謙溥子允則允正從子允恭為內殿崇班閻門祇候

允則字垂範少以材略間厯知潭滄雄鎮潞州嘗奏除潭州諸弊政又湖湘山田民不耕墾允則下令給諸軍芻甘輸粟藁由是山田遂無遺地初至滄州葺營壘多

開井泉言者以為擾未幾被兵近郊老幼皆入城保而水不乏真宗嘉之雄州居民惟結茅允則教以陶又合外舊瓮城與大城為一始創闕城焉增廣閭承翰所修屯田列隄道以通安肅廣信順安軍所以設險者蓋備契丹機密事動息皆知之當時邊臣無及者景德以後國信往還議制及所費用皆其所裁定智識開敏處事審當其方畧設施雖游觀亭傳莫不有所寓也官至寧

州防禦使卒

據東都事畧增

允正字修已以蔭補供奉官太平興國中掌左藏庫屢  
得升殿奏事太宗頗記憶其舊故雍熙中與張平同掌  
三班俄為閤門祇候四年為閤門通事合人時女弟適  
許王以居第質于宋偓太宗詰之曰爾父守邊二十餘  
年止有此第何以質之允正具以奏即遣內侍輦錢贖  
還縉紳多賦詩美之淳化中命討戎瀘州叛蠻遷西上  
閤門副使又提點左右藏屢乘傳北面經度邊要五年  
為衛州修河部署會建清遠軍積石峇命詣瀚海部分

其役還拜西上閤門使并州駐泊鈐轄俄代張永德知州事徙代州咸平初使西蜀詢訪民事還進秩東上閤門使歷知鎮莫二州又為并代馬步軍鈐轄契丹擾邊車駕駐大名允正與高瓊率太原軍出土門路來會召見便殿所部有廣銳騎士數百皆素練習命允正引入賜緡錢遣屯邢州與石保吉逐遼人遯去俄以兵會大名復還并代五年合涇原儀渭邠寧環慶路為一界命王漢忠為都部署驛召允正為鈐轄兼安撫都

監即日上道又命與錢若水同詣洪德懷安沿邊諸砦  
經度邊事加領誠州刺史罷兩路之職復任并代鈐轄  
每錢若水按巡邊壘即詔權涖州事進四方館使代馬  
知節為鄜延部署兼知延州改客省使知定州兼鎮定  
都鈐轄大中祥符三年累表求還至京師將祀汾陰以  
疾難於扈從命為河陽部署以便養會張從貴卒趙德  
明頗踰軼亟詔從允正為鄜延部署內侍密詔存諭禮  
成領河州團練使允正頗知書性嚴毅疎財喜自修飭



素病痾痿以是罕在要近累典邊任多殺戮是秋移知  
永興軍卒年五十一

姚內斌平州盧龍人少仕契丹為關西巡檢瓦橋關使  
周顯德六年世宗北征太祖將兵至瓦橋關內斌率眾  
降世宗以為汝州刺史內斌本名犯宣祖諱下一字遂  
改今名太祖即位從平李筠改號州刺史西夏數犯西  
鄙為慶州刺史兼青白兩池權鹽制置使在郡十數年  
夏人畏伏不敢犯塞號內斌為姚大蟲言其武猛也初

內斌降其妻子皆在契丹乾德四年子承贊密自幽州來歸五年幽州民田光嗣等又以內斌兒女六人間道來歸太祖並召見賜以衣服緡錢鞍馬令中使護送還內斌開寶四年召赴闕帝待之甚厚遣歸治所七年暴得疾卒年六十四子承贊為供奉官閤門祇候死于陣承鑒至殿中丞

董遵誨涿州范陽人父宗本當事契丹帥趙延壽及延壽被執舉族南奔漢祖得之擢拜隨州刺史署遵誨隨

州牙校周顯德初世宗北征大將高懷德遵誨之舅也  
表遵誨從行師次高平與晉人遇將接戰晉兵未成列  
懷德命遵誨先出奇兵擊之晉人潰大軍繼之遂敗之  
二年討秦鳳大將韓通又表遵誨自隨與敗戰于唐倉  
先登陷陣擒蜀招討使王鸞以獻克秦鳳二州師還錄  
其前後功補西登班押班又遷驍武指揮使四年從征  
淮南下合肥又從韓通平雄霸二州太祖微時嘗客遊  
至漢東依宗本遵誨憑藉父勢太祖每避之遵誨嘗謂

太祖曰每見城上紫雲如蓋又夢登高臺遇黑蛇約長百尺餘俄化龍飛騰東北去雷電隨之是何祥也太祖皆不對他日論兵戰事遵誨理多屈拂衣而起太祖乃辭宗本去自是紫雲漸散及即位一日便殿召見遵誨伏地請死帝令左右扶起因諭之曰卿尚記往日紫雲及龍化之夢乎遵誨再拜呼萬歲俄有部卒擊登聞鼓訴其不法十餘事太祖釋不問遵誨益惶愧待罪太祖召諭之曰朕方赦過賞功豈念舊惡耶汝可勿復憂吾

將錄用汝遵誨再拜感泣時遵誨母在幽州經患難睽  
隔太祖令人賂邊民竊迎其母送與遵誨遵誨遣外弟  
劉綜貢馬以謝太祖解所服真珠盤龍衣命齋賜之綜  
曰遵誨人臣豈敢當此太祖曰吾方委以方面不此嫌  
也從慕容延釗討李筠遷馬軍都軍頭因留鎮澤潞三年  
召歸遷散員都虞候乾德六年以西夏近邊授通遠軍  
使遵誨拊諭諸族酋長諭以朝廷威德剗羊醢酒宴犒  
甚至衆皆悅服後數月復來擾遂遵誨率兵深入其境擊

走之俘斬甚衆獲牛馬數萬夷落以定太祖嘉其功就拜羅州刺史如故太宗即位兼領靈州路巡檢遵誨豁達無崖岸多方畧能挽強命中武藝皆絕人在通遠軍凡十四年安撫一面夏人悅服嘗有剽掠靈武進奉使鞍馬兵器者遵誨部署帳下欲討之夏人懼盡歸所掠拜伏請罪遵誨即慰撫令去自是各謹封畧秋毫不敢犯歷太祖太宗朝委遇始終不替許以便宜制軍事太平興國六年卒年五十六錄其子嗣宗嗣榮為殿直

賀惟忠忻州定襄人少勇敢善騎射周祖將兵討三叛  
惟忠謁於道左自陳有武藝周祖悅之即留置所部洎  
開國得隸世宗帳下奏補供奉官不辭而去世宗怒之  
及嗣位終不遷擢初授儀鸞副使令知易州捍邊有功  
尋遷正使開寶二年太祖駐常山以惟忠為本州刺史  
兼易定祁等州都巡檢使嘗中流矢金瘡發而卒太祖  
聞之嗟悼即以其子昭度為供奉官惟忠性剛果知書  
洞曉兵法有方畧在易州繕完亭障撫士卒得其死力

每乘塞用兵所向必克威命震北邊故十餘年間契丹不敢南牧昭度至西京作坊使淳化中知通遠軍有罪當棄市減死流商州

馬仁瑀大名夏津人少與羣兒戲為行陣之狀自稱將軍日與之約鞭其後期者羣兒皆畏伏及長善射挽弓三百斤漢乾祐中周祖鎮鄴仁瑀年十六願隸帳下周祖素聞其勇既見甚喜留置左右廣順初補內殿直世宗親征劉崇至高平周師不利諸將多引退仁瑀謂衆



曰主辱臣死安用我輩乃控弦躍馬挺身出陣射賊斃者數十人士氣益振大軍乘之崇遂敗績擢為弓箭控竊直指揮使還京又遷散指揮使從征淮南至楚州攻水砦砦中建飛樓高百尺餘世宗觀之相去殆二百步樓上望卒厲聲罵世宗怒甚命左右射之遠莫能及仁瑀引滿應弦而顛及淮南卒身被數十創遷內殿直都虞候又從卒三關太祖即位以佐命功授散員都指揮使累遷領扶州團練使從平澤潞以功領常州防禦使

建隆二年改領岳州俄又改領漢州初詔仁瑀等領荆湖諸郡不數歲復其地至是將征蜀又詔領川峽諸郡遂平之先是薛居正知貢舉仁瑀私囑所與者榜出無其人間喜宴日仁瑀酒酣攜所囑者詣居正切責之為御史中丞劉溫叟所劾帝優容之又與后族王繼勳忿爭各勒所部兵欲相圖太祖密知之出仁瑀為密州防禦使太祖征晉陽命仁瑀率師巡邊至上谷漁陽契丹素聞仁瑀名不敢出因縱兵大掠俘生口牛羊數萬計駕

還仁瑀歸治所明年羣盜起兗州賊首周弼毛襲甚勇  
悍材貌奇偉監軍討捕數不利詔仁瑀掩擊仁瑀率帳  
下十餘卒入泰山擒弼盡獲其黨魯郊遂寧開寶四年  
遷瀛州防禦使兄子嘗因醉誤殺平民繫獄當死民家  
自言非有宿憾但過誤爾願以過失殺傷論仁瑀曰我  
為長吏而兄子殺人此怙勢爾非過失也豈敢以私情  
而亂國法哉遂論如律給民家布帛為棺殮具太平興  
國初移知遼州四年車駕從征太原有功又從成州刺史慕

容超飛龍使白重貴八作使李繼昇分兵攻城及征范陽敗契丹於盧龍北契丹兵奔潰師還遷朔州觀察使判瀛州事七年卒年五十贈河西軍節度使

按東都事畧作贈河

西觀  
察使

欽定續通志卷三百十四

欽定四庫全書

欽定續通志卷三百十五

列傳

宋

十九

王贊

盧懷忠

張延通

史珪

田欽祚

侯贊

翟守素

劉福

安守忠

孔守正

譚延美

元達

常思德

尹繼倫

薛超

丁罕

李斌

田仁朗

王贊澶州觀城人少為小吏累遷本州馬步軍都虞候周世宗鎮澶淵每旬決囚贊引律令辨析中理問之知其嘗事學問即署右職及即位補東頭供奉官累遷右驍衛將軍三司副使時張美為使世宗問京城衛兵歲廩幾何美不能對贊代奏甚悉美因是銜之及征關南言於世宗以贊為客省使領河北諸州計度使五代以

來姑息藩鎮有司不敢繩以法贊所至發擿姦伏無所  
畏忌振舉綱領號為稱職由是邊臣切齒師還復為三  
司副使太祖建隆初始平李重進太祖素知贊材幹可  
委以完葺即令知揚州既行舟覆於閭橋下溺死親屬  
隨沒者三人帝甚嘆悼謂左右曰溺吾樞密使矣蓋將

大用也

按宋史此下有張保續趙玘  
二傳無事蹟足錄今並從刪

盧懷忠瀛州河間人少有膂力善騎射漢乾祐初寓居  
河中值李守貞之叛周祖圍其城懷忠夜踰城出見陳

攻取便宜河中平奏補供奉官從征慕容彥超於兗州  
顯德初監沂州軍以所部破海州功居多世宗議北征  
先遣懷忠按視出師道路三關平遷如京副使太祖即  
位遷內酒坊副使會朗州軍亂太祖將出師致討遣懷  
忠使荆南因謂曰江陵人情去就山川向背我欲盡知  
之懷忠使還奏曰繼沖甲兵雖整而控弦不過三萬年  
穀雖登而民苦暴斂南邇長沙東距金陵西迫巴蜀北  
奉朝廷觀其形勢蓋日不暇給取之易耳太祖召宰相



范質等謂曰江陵四分五裂之國今出師湖南假道荆  
渚因而下之萬全策也太祖即以懷忠為前軍步軍都  
監荆湖平以功遷內酒坊使乾德二年改判四方館事

知江陵府四年王師伐蜀江陵當峽江會衝以供億之

勞遷客省使又明年使江南

按長編載開寶元年八月  
命客省使盧懷忠等二十

二人願兵屯潞州將有事  
於北漢也不言其使江南

還中途遇疾至京師未幾卒

年四十九大中祥符四年錄其子熙為校書郎

按宋史  
此下有

王繼勳丁德裕二傳無

事蹟足錄今並從刪

張延通潞州潞城人父彥成周右金吾衛上將軍延通性穎悟有才幹蔭補供奉官太祖即位歷通事舍人遷東上閤門副使開寶中為西川兵馬都監太祖以蜀寇未平命同內客省使丁德裕引進副使王班內臣張嶼領兵屯蜀部德裕頗專資延通面質其短德裕銜之又與張嶼不協延通亦為和斛德裕疑延通與嶼為黨益不悅會太祖征太原有使自行在至備言太祖當盛夏躬冒矢石勞頓萬狀延通曰主上勤勞若此而吾輩日

享安樂蓋言不自安也德裕不答會張嶼先歸闕太祖  
賜予甚厚延通德裕繼至則召延通顧問而待德裕稍  
薄德裕頗疑懼遂奏延通嘗對衆言涉指斥且多不法  
事指嶼為黨太祖怒即收延通張嶼及王班下御史臺  
鞠之延通等引伏太祖始欲捨之及引問延通抗對不  
遜遂斬之嶼班并內臣王仁吉並杖脊嶼配流沙門島  
班許州仁吉西密務時開寶二年也

按宋史此下有梁  
迴傳無事蹟足錄

今從

州

史珪河南洛陽人父暉晉嚴衛指揮使珪少以武勇隸軍籍周顯德中為小校太祖領禁衛以珪給事左右及即位用為御馬直隊長四遷馬步軍副都軍頭兼控鶴弓弩大劔都指揮使開寶六年加都軍頭領毅州刺史太祖初臨御欲周知外事令珪博訪珪廉得數事白於帝驗之皆實由是信之後乃漸肆威福民有市官物不當價者珪告其欺固當寘法列肆無不側目帝聞之曰將禁其二價宜示以明文自今應市易官物有妄增價

直欺罔官錢者案鞫得實並以枉法論其犯在詔前者  
不問自是珪不復敢言時德州刺史郭貴知邢州國子  
監丞梁夢昇知德州貴族人親吏之在德州者頗為姦  
利夢昇以法繩之貴素與珪善遣人以其事告珪圖去  
夢昇珪悉記於紙將伺便言于帝一日帝因言邇來中  
外所任皆得其人珪遽曰今之文臣亦未必皆善乃探  
懷中所記以進曰祇如知德州梁夢昇欺蔑刺史郭貴  
幾至於死帝曰此必刺史所為不法夢昇真清強吏也

因以所記紙付中書曰即以夢昇為贊善大夫既又曰與左善贊珪以諧不行居常快快尋坐漏洩禁中語出為光州刺史會歲饑淮蔡民流入州境珪不待奏即開倉減價以糶所全活甚衆太平興國初以為揚楚等九州都巡檢使四年征太原命珪與彰信軍節度劉遇攻城北面從征幽州坐所部逗撓失律責授定武行軍司馬數月召為右衛將軍領平州刺史督浚惠民河自尉氏達京九十里數旬而畢民咸便之受詔捕獲江淮盜麴

謀首等遷隰州刺史知保州靜戎軍上緣邊便宜十五  
事皆從之雍熙中從曹彬征幽州為押陣部署以所部  
下涿州師還卒年六十一珪多智數好以甘言小惠取  
譽於人故所至不忍其去云

田欽祚潁州汝陰人在漢為殿直改供奉官周世宗征  
淮南為前軍都監從征關南還會塞澶淵決河命欽祚  
領禁兵護役因令督治澶州城淮人寇高密刺史王萬  
威求濟師命欽祚領州兵援之既至圍解太祖即位遷

閣門通事舍人乾德二年討蜀為北路先鋒都監令乘  
傳往來宣達機事孟昶降奉捷書馳奏遷西上閣門副  
使蜀土寇亂又遣欽祚率師討平之四年并人寇樂平  
從羅彥瓌拒之欽祚獨以所部三千人破寇擒副將一  
人俘獲甚衆以功遷西上閣門使開寶二年又與何繼  
筠破敵于石嶺關領賀州刺史判四方館使三年契丹  
擾中山以欽祚為定州路兵馬都部署與戰遂城自旦  
及晡殺傷甚衆欽祚馬中流矢踣騎士王超授欽祚以



馬軍復振敵解去朝廷將議討江表遣欽祚覘之還奏  
合旨江南所得寶貨直三千萬悉以賜欽祚會興師首  
命欽祚與曹彬李漢瓊率騎軍先赴江陵就命為昇州  
西南路行營馬軍兼左廂戰擢都監敗吳軍萬餘于溧  
水斬其主帥李雄等五人擒裨將二人進圍金陵為南  
面攻城部署既平以功加領汾州防禦使太平興國初  
遷引進使為晉州都鈐轄太原驍將楊業率衆寇洪洞  
縣欽祚擊敗之斬獲盈千太宗賜欽祚白金五千兩令

市宅四年從征太原護前鋒騎兵屯石嶺關以扞契丹  
欽祚性剛戾數陵其主帥郭進進戰功高屢為欽祚所  
陵心不能甘遂自經死語詳郭進傳初賊兵奄至進出戰  
欽祚但閉壁自守既去又不追所受月奉芻粟多販鬻  
規利為部下所訴責授睦州團練使太宗北巡以為幽  
州西路行營壕砦都監六年改房州團練使累遷銀夏  
綏宥都巡檢使俄呂還會征幽州命為排陣使時欽祚  
已被病受詔不勝喜甫一夕卒欽祚性陰狡不喜儒士

好狎侮同列人多惡之子承誨仕至供奉官閣門祇候  
承說至崇儀副使

侯贊并州太原人父義漢遼州刺史贊以蔭補殿前承  
旨周顯德中遷供奉官江南復命領三門集津發運使  
太祖即位為諸衛將軍先是朝廷歲仰關中穀麥以給  
用贊掌其事歷三十年國用無闕累遷至右武衛將軍  
開寶中歷知建安軍揚徐二州皆有善政太宗即位移  
知福州改右衛將軍太平興國二年錢俶初納土詔贊

馳往兩浙諸州閱視軍儲芻艾累遷右軍大將軍七年  
知靈州按視蕃落宴犒以時得邊士心部內大治遷左  
衛在朔方凡十餘年帝念久次求可代者而難其人淳  
化二年卒于官年七十四增本衛上將軍

按宋史此下有王文寶傳

王文寶平泉州盜事已附見楊克讓傳中他無事蹟足錄今從刪

翟守素濟州任城人父溥晉左司禦率府率守素以父  
任為殿直歷漢周遷供奉官領承天軍使

按隆平集作任周至刺史

太祖乾德中為引進副使從王全斌伐蜀以往來馳告

軍事為職蜀平擢判四方館以兩川餘寇未殄慮致騷  
動再令守素入蜀經畧諸郡分兵以防遏之開寶中會  
麟府內屬戎人爭地不決因致擾亂詔守素馳往撫喻  
守素辨其曲直戎人悅服從征太原命海州刺史孫方  
進圍汾州守素監其軍轉引進使尋命為劔南十州都  
巡檢使太宗即位遷客省使領憲州刺史太平興國三  
年河決滎陽詔守素發鄭之丁夫千五百人與卒千人  
領護塞之是秋梅山洞蠻恃險叛命遣守素率諸州屯

兵往擊之值霖雨彌旬弓弩解弛不堪用明日將接戰守素一夕令削木為弩及旦賊奄至交射之賊遂敗乘勝逐北盡平其巢穴先是數郡大吏富人多與賊帥包漢陽交通既而得其書訊數百封守素並焚之反側以定俄而錢俶納土詔守素為兩浙諸州兵馬都監安撫諸郡旋命知杭州歲滿為西京巡檢使秦王廷美以事勒歸私第以守素權知河南府兼留守司事屬洛陽歲早艱食多盜帝憂之守素既至漸以寧息未幾遷高州

團練使雍熙二年改知延州自劉廷讓敗于君子館河朔諸州城壘多圯四年詔守素與田仁朗王繼恩郭延濟分路按行發諸州鎮兵增築護其役賜白金三十兩留充天雄軍兵馬鈐轄知大名府改知潞州會建方田命為代北方田都部署并州兵馬鈐轄徙屯夏州改知鳳翔府淳化中夏帥趙保忠上言其弟繼遷誘戎人為寇且求援師詔守素率兵復屯夏州未幾又徙石州以老病上疏求歸本郡從之三年卒年七十一守素逮事

四朝縣歷內職五十餘年性謹慎寬仁容衆所至有治績凡斷大辟獄雖罪狀明白仍徧詢僚寀僉同而後決屬吏有過不面折但援往事之相類者以微警之新進後生多至節帥而守素久次不遷殊無隕獲意時論以

此多之

按宋史此下有王侁劉審瓊二傳無事蹟足錄今並刪

劉福

按隆平集作留福

徐州下邳人少倜儻魁岸有膂力周顯

德中世宗征淮南福徒步謁見于壽春世宗竒之因留麾下每出戰則令福率衛士為先鋒與破紫金山砦淮



南平錄功授懷德指揮使太祖即位遷橫海指揮使率所部隸步帥劉光毅由峽路征蜀比至成都孟昶已降大將王全斌部送降卒歸京師至綿州降卒盜庫兵劫蜀舊將全師雄叛福與龍捷指揮使田紹斌夾擊之賊衆大潰斬首及溺江死者以萬計以功授虎捷都虞候繼隸曹彬麾下平江南還授指揮使領蔚州刺史從太宗克并汾遷馬步都軍頭武州團練使端拱初出為洺州防禦使二年改雄州兼本州兵馬部署雄州地控邊

塞常屯重兵福至部按行城壘調鎮兵以給繕完出私  
錢以資宴犒寇雖大至而恃以無恐淳化初遷涼州觀  
察使判雄州事二年卒年六十四贈太傅

按隆平集作  
卒贈節度使

福雖不學而御下有方略為政簡易人甚德之領雄州  
五年郡境寧謐福既貴諸子常勸起大第福怒曰我受  
祿厚足以餼舍庇汝曹但無尺寸功報朝廷豈可營度  
居室為自安計乎卒不許既死帝聞其言賜其子白金  
五千兩使市第宅

安守忠字信臣并州晉陽人父審琦周平盧軍節度封  
陳王晉天福八年審琦出領山南東道以守忠為牙內  
指揮使領繡州刺史周顯德四年改鞍轡庫使會淮南  
初下命守忠馳往宣諭時藩臣驕蹇遇朝使多簡傲守  
忠抗以正禮不辱命未幾改衛州刺史太祖即位入為  
左衛將軍建隆四年湖南初平命為永州刺史乾德中  
護河陰屯兵蜀平太祖知遠俗苦苛虐南鄭為走集之  
地故特命守忠知興元府以撫綏之四年改漢州刺史

時寇雖甫平使車旁午公帑不足守忠出私錢以給用  
每遣使太祖必戒之曰安守忠在蜀能律己以正汝行  
見之當效其為人也開寶初改濮州刺史會河決澶州  
命守忠副潁州團練使曹翰護役河決遂塞五年知遼  
州民有陰召并寇謀內應者事泄守忠悉斬以徇九年  
命將征太原守忠受詔與孫晏宣由遼州入既而與路  
羅岩監押馬繼恩遇乃相與會兵入賊境燔砦四十餘  
獲牛羊數千議將深入會帝崩乃班師太平興國初移

知靈州在官凡七年雍正二年改知易州徙夏州每西  
戎犯邊戰無不捷錄功就拜濮州團練使端拱中知滄  
州改瀛州兼高陽關駐泊部署遷瀛州防禦使初守忠  
嘗夢一濮字方丈餘及領是郡幾二十年於是始悟淳  
化二年徙知雄州方與僚佐宴飲有軍校謀變探甲及  
閤閤者倉卒入白守忠言笑自若徐顧坐客曰此輩酒  
狂爾擒之可也人服其量明年加耀州觀察使兼判雄  
州未幾召還奏邊事稱旨五年又知滄州至道初移雄

州三年復知滄州拜威德軍節度觀察留後徙宋州兼制置營田使威德兼著吏民不忍其去咸平三年入覲遺還未行暴卒年六十九贈太尉錄其子繼昌為供備庫副使壻王世及為光祿寺丞守忠謹慤淡薄為治簡靜太祖居藩日素相厚善及受禪後每優任之守忠處之益謙從征太原多與謀畧人罕知之者所至藩郡樂施予豐宴犒且喜與士大夫遊從故時論多與之

孔守正開封浚儀人周世宗征淮南以材勇選為東班

承旨太祖即位補內殿直兼領驍雄吐渾指揮從劉廷翰平蜀還遷驍雄副指揮使開寶中征太原守正隸何繼筠麾下會契丹遣兵來援晉陽守正大敗契丹兵於石嶺關獲其將王破得時王師之陷敵者數百人守正以騎軍馳之盡奪以還太平興國中累遷日騎東西班指揮使從太宗親征晉陽守正分主城西洞屋領步卒大呼先登繼與內侍蔡守恩等率騎兵力戰晉軍遂潰從征范陽至金臺驛詔與劉仁蘊先趨岐溝關時城未

下守正夜超垣度鹿角臨機橋以大將軍至說關使劉

禹

按長編作東易州刺史劉禹蓋契丹名岐溝闕曰東易州也

使降禹解懸橋守正

入城撫諭其軍民以城守屬綦廷朗而已赴行在時契

丹兵在涿州東守正與傅潛率御前東西班分兩陣馳

擊之逐北二十餘里降其羽林兵數百人繼與高懷德

劉廷翰合兵追之至桑乾河契丹自是不敢近塞以勞

再遷日騎都指揮使領濡州刺史端拱初遷龍衛都指

揮使領長州團練使出鎮真定旋為潁州防禦使太宗



以其練習戎旅特置龍衛神衛四廂都指揮使以授之  
改領振州防禦使明年拜殿前都虞候領容州觀察使  
一日侍宴北苑守正大醉與王榮論邊功于帝前忿爭  
失儀侍臣請以屬吏帝弗許翼日俱詣殿請罪帝曰朕  
亦大醉漫不復省遂釋不問俄命為定州行營副部署  
受詔詣保州軍開道遇敵于曹河與戰數合梟首三十  
餘獲馬五十匹帝聞而壯之淳化初擢高陽關副都部  
署軍中小將有詈其校長者守正械送闕下未嘗專決

焉明年護浚惠民河塞澶州決河就命知州軍改慎州  
觀察使還領代州部署連移并代夏綏麟府三鎮與李  
繼遷戰大橫岡援范廷召出塞破賊于白池至行莊焚  
掠甚衆改代夏二州部署真宗即位復徙代州咸平初  
授昌化軍節度觀察留後守正上言四任鴈門邊亭久  
安願徙東北以自效會夏人自寇改定州行營副都部  
署四年移彰德軍留後以風疾妨政改安化軍留後景  
德初復以不任職代時議防秋北鄙守正猶屢表請行

帝閔之許未幾卒年六十六贈泰寧軍節度使

譚延美大名朝城人軀幹壯偉少為盜于鄉里周世宗鎮澶淵募置帳下即位補殿前散都頭從征淮南遷控鶴軍副指揮使又從克三關時太祖領禁兵留督牙隊太祖即位補控鶴指揮使稍遷都虞候馬步副都軍頭征湖南與解暉分領行營戰權都指揮使時汪端寇攻朗州甚急招討慕容延釗遣延美率兵赴之大敗賊衆擒端以還擢鐵騎副指揮使領睦州刺史四遷至內殿直

都知太平興國初為蘄州刺史連徙廬壽濠光州軍巡  
檢使劇賊之為害者悉就捕六年徙知威虜軍雍熙三  
年舉兵北伐命延美為幽州西面行營都監與田重進  
出飛狐北俄遇敵延美曰彼恃衆易我宜出其不意先  
攻之即麾騎軍直進敵兵將潰大軍繼至遂敗之斬首  
五百獲其將大鵬翼以獻擢本州防禦使逾年改亳州  
出為鎮州鈐轄端拱元年徙知寧遠軍一旦契丹兵抵  
城下延美開門示之不敢入圍城數日開門如故民出

取芻糧者無異平日契丹卒疑之遂引去二年進邕州  
觀察史判亳州兼知代州是時任邊郡者皆令兼領內  
地一州處其家屬徙知潞陝涇州咸平四年以左領軍  
衛上將軍致仕六年卒年八十三贈建武軍節度子繼  
倫至崇儀副使雍虞部員外郎

元達初名守旻洺州雞澤人身長八尺餘負膂力善射  
家業農不任作苦委耒耜慨嘆而去之任俠縱酒嘗醉  
見道旁槐樹拔劍斬之樹立斷達私喜曰吾聞李將軍

射石虎飲羽令樹為我斷豈神助歟嘗從少年數十百人欲起為盜里中老父交戒之乃止時郡以戶籍調役達當送徒闕下行數舍乃悉縱之曰吾觀汝曹亦丈夫也豈樂為是哉可善自為計吾亦從此逝矣已而追捕至達援弓引滿待之追者不敢近由是亡命山林間太宗居晉邸時達求見得隸帳下嘗侍太宗習射園亭命之射達射四發不中的已而連中太宗喜為更其名曰達及即位補御龍直隊長雍熙初累遷媯州刺史繼領

本州團練使時州郡部送亡命者至闕左右諷殺之達  
奏請赦之使自新且成好生之德從之端拱二年擢侍  
衛步軍都虞候領幽州刺史歷北面行營都部署由常  
山鎮入為京城巡檢按隆平集累擢至封州觀察使淳化四年卒年四  
十二贈昭化軍節度達雖奮自草野歷職戎署至交士  
夫能折節盡禮人以是稱之

常思德開封人周顯德初以材勇應募隸天武軍累遷  
神衛都虞候太宗雍熙初從曹彬征幽州因署牙校尋

鎮威虜軍端拱初以弓箭直都虞候領溪州刺史淳化中李順叛蜀命往夔峽招捕師次達州新寧縣調近州土兵掩殺賊徒三千餘人于梁山時雷有終領大軍抵合州境上賊衆二萬來拒思德與尹元裴莊等合擊之合州遂平賊帥田奉正蘇榮據果州思德因其遁而追捕之斬首八百果州既定餘賊保渠州及走廣安梁山乃分兵為二抵廣安梁山者思德領之趣渠州者元莊領之合力進討盡殲其黨自是川峽賴以安靜無復寇



患以功真授汝州刺史初曹彬北征不利至涿州左右皆潰散獨思德以所部護至易州語人曰既備戎行則與主帥同死生可也若視利害以為去就將何面目以見君父乎太宗嘗聞其言至是陞辭深加勞慰且諭之曰為臣以忠實為本汝少仕時即以驍勇自効且能盡心于主將事朕之日雖久而忠實如一今雖老亦當盡心乃職庶無負乎朕之委寄也未幾移慶州路副都部署屯邠州咸平初與李繼隆同部芻糧赴靈州以疾改陳

留都監換左神武大將軍二年卒年六十五

尹繼倫開封浚儀人父勲郢州防禦使嘗內舉繼倫以  
為可用太祖以補殿直權領虎捷指揮預平嶺表下金  
陵太宗即位改供奉官從征太原還遷落苑使充北面  
緣邊都巡檢使端拱中威虜軍糧餽不繼契丹潛議入  
侵帝遣李繼隆發鎮定兵萬餘護送輜重數千乘契丹  
將鬆悅謀知之率精銳數萬騎將邀于路繼倫適領兵  
到不與敵直裕悅徑趨大軍過繼倫軍不顧而去繼

倫謂其麾下曰敵蔑視我爾彼南出而捷還則乘勝驅我而北不捷亦且洩怒於我將無遺類矣為今日計不如卷甲銜枚以躡之彼銳氣前趣不虞我之至力戰而勝足以自樹縱死猶不失為忠義豈可泯然而死為異域鬼乎衆皆憤激從命繼倫令軍中秣馬俟夜將短兵潛躡其後至唐州徐河間天未明越去大軍四五里會食訖將戰繼隆方陣于前以待繼倫從後急擊殺其將皮室一人皮室者契丹相也皮室既擒衆遂驚潰裕悅

方食失箸為短兵中其臂創甚乘善馬先遁契丹自是  
不敢窺邊其平居相戒則曰當避黑面大王以繼倫面  
黑故也以功領長州刺史仍兼巡檢使淳化初作佐郎  
孫崇諫自契丹逃歸太宗詢以邊事極言徐河之戰契  
丹為之奪氣故每聞繼倫名則倉皇不知所措於是遷  
繼倫尚食使領長州團練使以勵邊將淳化五年李繼  
隆奉詔討夏州以繼倫為河西兵馬都監未幾以深州  
團練使領本州駐泊兵馬部署至道二年分遣將帥為

取芻討季繼遷時大將李繼隆由靈環路往逗撓不進  
帝怒思召繼倫至京師投靈慶兵馬副都部署欲以夾  
輔繼隆也時繼倫已被病強起受詔帝素聞其嗜酒以  
尊酒賜而遣之即日乘驛赴行營至慶州卒年五十遣  
中使護其喪而歸葬焉

薛超遼州平城人少有勇力乾德初應募為虎捷卒從  
崔彥進平蜀錄功補虞候遷十將太平興國初四遷至  
天武指揮使從征太原領遊騎千人備禦鎮定境上以

張軍勢及車駕還契丹頻侵鎮定超從大將劉廷翰率兵至徐河敵將領騎十餘出挑戰超躍馬直前連射數人遂擊敗之以功加步軍都軍頭遷神衛軍都校領叙州刺史雍熙三年從潘美北征至鴈門西陁路與契丹遇又戰敗之追至寰州其將趙彥辛以城降超連被創流血濡甲縷部分軍士自若乘勝抵應州其節度副使艾正以城降還加馬步軍都軍頭淳化初屯鎮州遷天武指揮使領澄州團練使至道元年卒年五十七

丁罕者潁州人應募補衛士累遷指揮使從劉廷翰戰  
徐河以奪橋功遷本軍都虞候累遷天武指揮使領獎  
州團練使淳化三年出為澤州團練使知霸州會河溢  
壞城壘罕以私錢募築民咸德之五年以容州觀察使  
領靈環路行營都部署與李繼遷戰斬首俘獲以數萬  
計至道中率兵從大將李繼隆出青岡峽賊聞先遁追十  
日程不見而返三年真拜密州觀察使知威虜軍徒貝  
州咸平二年卒子守德能世其家

按宋史此下有趙瑫  
附傳又有郭密傳思

欽定四庫全書

卷三百五

讓二傳俱無事  
蹟足錄今從刪

李斌者青州人太宗在晉邸聞其狀貌魁偉召至左右  
即位補御龍直副指揮使太平興國中以天武指揮使  
領鄭州刺史七年坐嘗受秦王廷美饋遺貶曹州都校  
雍熙三年遷營州刺史四年領溪州團練使連為貝冀  
二州駐泊都監淳化中繼領萊州洺州團練使勤於政  
理人服其清慎轉運使陳緯以狀聞於朝至道初拜桂  
州觀察使仍判洺州徙滄州及代吏民不忍其去鄰境



亦上其善狀詔書褒美之咸平三年卒年六十一

田仁朗大名元城人父武仕晉昭義軍節度使仁朗以父任始為西頭供奉官太祖即位從討李重進攻城有功還與右神武統軍陳承昭浚五丈河以通漕運乾德中討蜀命仁朗為鳳州路壕砦都監伐木除道大軍以濟錄功遷染院副使從征太原還與陳承昭壅汾水灌城城將陷會班師俄遷內染院使數日改左藏庫使為中官所讒太祖怒立召詰之至殿門命去冠帶仁朗神

色不撓從容曰臣嘗從破蜀秋毫無犯陛下固知之今  
主藏禁中豈復為姦利以自汙太祖怒釋止停其職開  
寶六年起為權易使七年以西北邊內侵選知慶州仁  
朗至率麾下往擊之短兵將接前鋒稍却仁朗斬指揮  
使二人軍中震恐爭乞効命遂大破之敵相率請和仁  
朗烹牛置酒與之約誓邊境乃寧璽書褒美太平興國  
初秦州羌為寇命仁朗屯兵清水會李飛雄事敗召為  
西上閣門使四年征太原命仁朗與閣門祗候劉緒按

行太原城四面壕堦閱視攻城梯衝器械太原平留仁  
朗為兵馬鈐轄閑廩使武再興軍器庫副使賈湜並為  
巡檢俄命仁朗與再興役民築榆次新城從幸大名改  
滄州鈐轄俄遷東上閣門使知秦州九年判四方館事  
李繼遷為亂命仁朗率兵巡銀夏歲餘召還未幾繼遷  
攻麟州誘殺曹光實遂圍三族砦命仁朗與閣門使王  
侁副使董愿宮苑使李繼隆馳傳發邊兵數千擊之仁  
朗次綏州奏請益兵留月餘俟報會三族砦將折遇七

殺監軍使者與繼遷合太宗怒亟遣軍器庫使劉文裕  
自三交乘疾置代仁朗繼遷乘急攻撫寧砦仁朗不知  
為文裕所代喜謂諸將曰今繼遷嘯聚羌戎數萬盡銳  
以攻孤壘撫寧小而固兵少而精未可以旬浹破當留  
信宿俟其困以大兵臨之分強弩三百邀其歸路必成  
擒矣仁朗部署已定欲示閑暇日縱擣博及赴闕下御  
史按問請益兵及陷三族狀仁朗對曰所召銀綏夏兵  
其州皆留防城不遣所部千餘人皆曹光實舊卒器甲

不完故請益兵況轉輸芻粟未備三族皆與綏相去道  
遠非元詔所救昨臣已定擒繼遷策會詔代臣其謀不  
果因言繼遷得部落情願降優詔懷來之或以厚利啗  
諸酋長密圖之不爾恐他日難制大為邊患御史以其  
狀聞帝大怒切責憲府官吏曰仁朗不恤軍政得為過  
乎大理遂當仁朗乏軍興及征人違期二十日以上坐  
死帝特貸之責授商州團練副使馳驛發遣是役也仁  
朗計已決為王侁等所構逗撓不進軍故及於貶後數

月帝知其無罪召拜右神武大將軍部修河北東路諸州城池數月而就留知雄州加領澄州刺史時河北用兵大藩多用節將朝議以通判權位不倫尋選諸司使有吏幹者佐大藩以仁朗知定州節度副使事端拱二年召赴闕未聞命而卒年六十時端拱二年也仁朗性沉厚有謀畧頗涉書傳所至有善政云

按宋史此下有劉謙傳無事蹟

足錄今從刪

欽定續通志卷三百十五